

Upernaakkut 2017-mi ataatsimiinnissamut ilaqutariit pissakinnerusut akunnattumillu aningaasarsiallit nammineerlutik illutaarsinnaanerit pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut.

(Saqq.: Inatsisartunut ilaasortaq Anthon Frederiksen, Partii Naleraq)

Siunnersuutip aappassaaneerqarneranut

Sanaartornermut ataatsimiititaliap

ISUMALIUTISSIISSUTAA

Suliarineqarnerani Ataatsimiititaliap ukuninnga inuttaqarpoq:

Inatsisartunut ilaasortaq Anders Olsen, Siumut, siul.

Inatsisartunut ilaasortaq Kalistat Lund, Inuit Ataqtigiit, siul. tull.

Inatsisartunut ilaasortaq Justus Hansen, Demokraatit

Inatsisartunut ilaasortaq Jens-Erik Kirkegaard, Siumut

Inatsisartunut ilaasortaq Ane Hansen, Inuit Ataqtigiit

UPA 2016-ip nalaani ull. 13. maj 2016 siullermeerereermermi Ataatsimiititaliap siunnersuut misissorpaa.

Siunnersuutip imaa siunertaalu

Siunnersuutip siunertaraa innuttaasut amerlanerit nammineq pigisaminnik ineqarnissamut periarfissaqarnissaasa isumannaarneqarnissaa.

Siunnersuutip Inatsisartuni siullermeerneqarnera

Ataatsimiititaliap maluginiarpaa, ilaqutariittut inuumermi namminermut ilaqutaasunullu toqqissisimanartumik ineqarnissaq pingaaruteqartuusoq oqaaseqartartunit ilalernartinneqartoq. Taamaattorli tamanna anguniassallugu aqqutissaanersoq isumaqatigiinngissutigineqarpoq. Oqaaseqartartut ataasiakkaat saqqummiussaata uani annertunerusumik sammineqarniannigilaq, taamaattumillu oqaasertartut saqqummiussaata tamarmik innersuussutigineqarput.

Apeqqutit

UPA 2016/142

J.nr. 01.37.01.03-00105

J.nr. 01.25.01/16FM-LABU-00105

Ataatsimiititaliap siunnersuutip suliarineqarnissaanut atugassatut siunnersuutip siullermeerneqarnerani apeqqutigineqartut arlallit pillugit allakkatigut akissutit tigunikuuai. Naalakkersuisunut ilaasortap akissuteqaataata assilnera isumaliutissiisummut uunga tapiliunneqarpoq, takuuk **Ilanngusaq 1.**

Saaffiginninerit

Ull. 18. april Ataatsimiititaliap A/S Inissiaatileqatigiiffik INI ataatsimeeqatigaa. Ataatsimiinnermi Ataatsimiititaliap piumasaqarneratigut pisumi A/S Inissiaatileqatigiiffik INI aamma Ataatsimiititaliap siunnersuummut saqqummiunneqartumut isummaminnik ilisimatitsipput.

Ataatsimiititaliap siunnersuummik suliaqarnera

Ataatsimiititaliap maluginiarpaa, ukiut 20-t kingullit ingerlaneranni namminerisamik initaarnissamut aaqqissuussinerit uku atuussimasut, taakkulu mianersortumik ima allattorneqarput:

- Sanaartukkanut nutaanut, aaqqissuussineq 60-20-20
- Illunut pioreersunut, aaqqissuussineq 10-40-50 (siusinnerusukkut aaqqissuussineq 10-40-50)
- Nutarterinerimut taarsigassarsianut, aaqqissuussineq 10-40-50
- Piginneqatigiilluni inissialiornermut
- Piginnettumut piginneqataassutsit
- Attartortumit piginnittuunermut, aaqqissuussineq 60-40
- Attartortumit piginnittuunermut, aaqqissuussineq nutaanngitsoq
- Boligstøtte, aaqqissuussineq nutaanngitsoq
- Boligstøtte, kap. 4
- Boligstøtte, kap. 5. (illut sanaqataaffiusut)
- Aningaasanut inatsimmi oqaasertaliussat tunngavigalugit maanna aaqqissuussineq, konto pingaarneq 72.06.51
- Aningaasanut inatsimmi oqaasertaliussat tunngavigalugit siusinnerusukkut aaqqissuussineq
- Inissiat pisortanit taarsigassarsiffiunngitsut

Paasissutissat saqqummiunneqartut tunngavigalugit Ataatsimiititaliap nalillivoq, ilaqtariit pissakinnerusut akunnattumillu aningaasarsiallit nammineerlutik initaarsinnaanerit pillugu maanna isumannaarneqarsimasunik arlariinnik aaqqissuusaqartoqartoq. Taamaattumillu Ataatsimiititaliattaap maluginiarpaa, aaqqissuussinerit taakku arlaqartunik ilaqtartut innuttaasunut pineqartunut naammattumik ilisimatitsissutigineqarsimanngitsunik.

Ataatsimiititaliap siunnersuummik paasinninneratut, siunnersuuteqartup siunertaa tassaavoq, Naalakkersuisut suliniutiminnik Inatsisartunut UPA 2017-imut saqqummiussitinneqarnissaat. Taamaalillutik suliniutit nutaat saqqummiunneqassasut pisariaqartutut oqaatigineqanngillat, suliniutinulli ataatsimut atuutereersunut killiliisoqarsinnaasoq.

Naggataarutaasumik siusinnerusukkut Sanaartornermut ataatsimiititaliaasimasup ineqarnermut akiliutit aamma innuttaasut namminerisaminnik aningaasaqarnerat pillugu oqaatigisimasai uteqqissallugit Ataatsimiititaliaq pissutissaqarsoraaq, tamatumunngalu ilanngullugu isumaginninnikkut isumannaarinermut tunngasoq tassaasoq ineqarnermut tapiissut. Taamaalilluni UPA 2014/34-mut ataatsimiititaliaq ima allappoq:

”Ataatsimiititaliap misissuinermini ilisimalersimavaa Ineqarnermut tapiissutisinissamut aningaasanut killiliussat, nammineq akileeqataassutissat kiisalu ineqarnermut tapiissutit aningaasartaasa minnerpaaffissaat annerpaaffissaallu pillugit Namminersornerullutik Oqartussat nalunaarutaat nr. 12, 28. maj 2003-imeersoq atuutilersinneqarsimasoq Inatsisartut Peqqussutaat nr. 3, 31. maj 200 l-imeersoq naapertorlugu. Inissiani attartortittakkani ineqarnermut tapiissutit killiussanik aningaasartalerneqarnikupput, taakkulu 2003-miilli iluarsiiisuteqarfigineqarsimannngillat. Kalaallit Nunaanni Naatsorsueqqissaartarfimmit paasissutissanik pissarsereermermi maluginiarneqarsinnaasimavoq piffissami januarimi 2003-miit 2013-imi juulimut atuisunut akit 32,6 %-imik qaffariaateqarsimasut, taamaallaallu piffissami 2008-mi januarimiit 2013 -imi juulimut ineqarnermut akigitinneqartartunut naleqqersuut 28,7%-imik qaffariaateqarsimasoq.

Piffissami 1.4.2003-miit 1.4.2013-imut SIK-mi akissarsiat qanoq qaffassimanerat takussutissiisutigineqarpoq. Niuernerme allaffissornermilu ikiortip akissaateqarfimmi kingullermiittup SIK-mik isumaqatigiissut § 3 naapertorlugu tunngaviusumik akissarsiai 25,2 %-imik qaffassimapput. Isumaqatigiissummi tassani fuldmægtigip akissaateqarfimmi kingullermiittup isumaqatigiissut taanna naapertorlugu tunngaviusumik akissarsiai 21,2 %-imik qaffassimapput.

Taamaalilluni nalinginnaasumik innuttaasooq akitigut annertuumik qaffariaammik nalaataqarsimavoq, taamatuttaarlu ineqarnermut akiliutigisartakkatigut. Naak akissarsiatigut ineriartorneq ilaatigut akitigut ineriartornermut malinnaasimagaluatoq, taava SIK-mi ilaasortanut akissarsiatigut pisisinnaassuseq appariaateqarsimasoq maluginiartariaqarpoq. [2016-imi Ataatsimiititaliap ataatigut titarniliinera]

Qulaani naatsorsuinermik inerniliussat tunngavigigaluaanniluunniit Ataatsimiititaliaq isumaqarpoq, ineqarnermut tapiissuteqartarnermi killissarititaasoq iluarsineqarsimannngitsoq, tamannalu nunami isertitakinnerpaanut immikkut eqquisimasoq. Taamaalilluni Ataatsimiititaliaq isumaqarpoq [...] aningaasatigut killissarititaasut ineqarnermut tapiissuteqartarnermut peqqussut naapertorlugu aalajangersarneqarsimasut iluarsiiiffigineqartariaqartut.

Ataatsimiititaliap aamma maluginiarpaa, pissutsit qulaani isiginiarneqartut Akileraartarnermut Atugarissaarnermullu Ataatsimiititaliap isumaliutissiissutaanut 2011-meersumut naapertuuttut.”

Ataatsimiititaliap maluginiarpaattaaq peqqussut qulaani pineqartoq taassumallu nalunaarutitai 2015-imi aqqissuuteqqinneqarlutillu nutarterneqarsimammata¹. Taamaattorli tapiissutisinissamut killissarititat misissorneqarsimanngillat, taamaattumillu ajornartorsiut siuliani taaneqartoq annertuseriaqqiinnarsimavoq.

Taamatut pisoqarpoq, naak Sanaartornermut ataatsimiititaliaq isumaliutissiissummi qulaani pineqartumi matumuunakkullu eqqaamaneqarpoq ima inassuteqarsimagaluatoq:

“Ataatsimiititaliaq isumaqatigiittoq isumaqarpoq, ineqarnermut tapiissuteqartarnermut atatillugu killissarititaasunut malittarisassat atuuttut periarfissaq siulleq atorlugu aqqissuuteqqinneqartariaqartut.

Ataatsimiititaliaq isumaqatigiittoq isumaqarpoq, ineqarnermut tapiissutinut killissarititaasut aqqissuuteqqinneranni killissarititaasut nikerarsinnaasut atuutilernissaat isumaliutigineqartariaqartoq, taamaalillunilu assersuutigalugu nalinginnaasumik akinik nikerartitsineq malinneqarsinnaassalluni.”

Siunnersuutip aningaasatigut kingunissai

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq. Ataatsimiititaliap paasivaa, tamanna tunngavigalugu siunnersuutip piviusunngornerani aningaasatigut kingunissai taaneqarsimasut, taamaalillutik allaffissornikkut aningaasatigullu siunnersuutip kingunissai tassaalissallutik AC tunngavigalugu sulisitap akissarsiaasa affai.

Tamanna tunngavigalugu Ataatsimiititaliaq allatut isummernissamut tunngavissaqanngilaq

Ataatsimiititaliap inassutai

Ataatsimiititaliaq isumaqatigiittoq siunnersuut pillugu ima oqaaseqassaaq:


¹ Ineqarnermut tapiissutisinissamut aningaasanut killiliussat, nammineq akileeqaataassutissat kiisalu ineqarnermut tapiissutit aningaasartaasa minnerpaaffissaat annerpaaffissaallu pillugit Namminersorlutik Oqartussat nalunaarutaat nr. 22, 29. december 2015-imeersoq, taannalu tunngaveqarpoq Inissiani attartortittakkani ineqarnermut tapiissutit pillugit Inatsisartut inatsisaat nr. 23 7. december 2015-imeersumi § 8, imm. 2-mik

Ineqarnermut tunngasutigut Naalakkersuisut UPA 2017-imut suliniutiminnik Inatsisartunut saqqummiussinissaannik siunnersuut malitseqassaaq. Ineqarnermut tapiissutinik aaqqissuussinerit assigiinngitsut qanoq atuunnersut pillugit saqqummiussami ataatsimut isigalugu takussutissiisoqassaaq allaaserisaqartoqarlunilu.

Ineqariaatsit siunissami qanoq tapersersorneqarnissaannut Naalakkersuisut isumaat saqqummiussami imaritinneqassaaq, kiisalu nassuiaatigineqassaaq ilaqutariit pissakinnerusut akunnattumillu isertitaqartartut inimik siunissami qanoq pitsaanerpaamik pilersorneqarsinnaanersut.

Ataatsimiititaliami amerlanerusuteqartut qulaani taaneqartut tamanna tunngavigalugu siunnersuut taama isikkoqartillugu Inatsisartunit akuerineqassasoq inassutigaa.

Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Anders Olsen
Siulittaasoq



Kalistat Lund
Siulittaasup tullia



Justus Hansen



Jens-Erik Kirkegaard



Ane Hansen